




REPUBLIKA E KOSOVËS
REPUBLIKA KOSOVA - REPUBLIC OF KOSOVA
KOMISIONI I PAVARUR I MEDIAVE
NEZAVISNA KOMISIJA ZA MEDIJE
INDEPENDENT MEDIA COMMISSION



RTV 21
Afërdita Kelmendi
Drejtoreshë
Prishtinë



VENDIM

Lidhur me Rastin Nr. 2021/271 – Komisioni i Pavarur i Mediave (KPM) për RTV 21 (Pala Përgjegjëse)

Faktet

1. Komisioni i Pavarur i Mediave (KPM) me datën 28 maj 2013 ka nxjerrë Rregulloren për Mbrojtjen e Fëmijëve dhe të Miturve në Shërbimet Mediale Audiovizuale KPM 2013/01. Me këtë rregullore është përcaktuar mënyra e kategorizimit, sinjalizimit dhe zgjedhjes së kohës së transmetimit të programeve të cilat mund të ndikojnë negativisht në zhvillimin fizik, mental, emocional dhe moral të fëmijëve dhe të miturve.
2. KPM ka bërë monitorimin e Palës Përgjegjëse për të vlerësuar pajtueshmërinë me rregulloret e KPM-së: Rregulloren KPM-2013/01 për Mbrojtjen e Fëmijëve dhe të Miturve në Shërbimet Mediale Audiovizuale, Rregulloren KPM-2017/07 për Komunikimet Komerciale Audiovizuale si dhe Kodin e Etikës KKPM-2016/03 për Ofruesit e Shërbimeve Mediale në Republikën e Kosovës, lidhur me transmetimin e përmbajtjeve programore të cilat mund të jenë të dëmshme për fëmijë dhe të mitur. Monitorimi është bërë për 24 orë brenda një jave nga data 22 deri 28 maj 2021.
3. KPM në bazë të Raportit të monitorimit të datës 11 qershor 2021 ka gjetur se Pala Përgjegjëse ka transmetuar filmin “*Reasonable Doubt*”, i cili përmban pamje dhune dhe frike dhe gjatë transmetimit nuk është kategorizuar dhe shoqëruar me shenjë përkatëse 10+.
4. KPM, pas të gjeturave nga Raporti i monitorimit, me datën 16 korrik 2021 i ka dërguar Palës Përgjegjëse Njoftim për shkelje, me të cilin e ka njoftuar për shkeljet e bëra dhe i ka kërkuar të veprojë në pajtim me Rregulloren KPM 2013/01, duke i ofruar mundësinë që brenda afatit prej tre (3) ditësh të përgjigjen dhe të ofrojnë sqarimet e tyre në raport me shkeljet e lartpërmendura.
5. KPM-së me datën 26 korrik 2021 ka pranuar përgjigje nga Pala Përgjegjëse me arsyetimin se kanë kujdes sa i përket shenjave të vërejtjes për çdo transmetim, ndërsa sa i

përket shkeljeve që janë bërë lidhur me filmin e lartpërmendur, kanë gjetur se është bërë një lëshim teknik.

6. KPM, pas Njoftimit për shkelje ka bërë edhe një monitorim të dytë për të parë nëse Pala Përgjegjëse ka ardhur në pajtueshmëri me Rregulloren KPM-2013/01. Monitorimi është bërë për datat prej 29 deri me 31 korrik 2021 dhe në bazë të Raportit të monitorimit të datës 6 gusht 2021 ka gjetur se Pala Përgjegjëse ka transmetuar filmin artistik "96 Minutes" në dy termine me kategorizime të ndryshme, i cili përmban pamje dhune dhe frike gjatë transmetimit dhe nuk është kategorizuar dhe shoqëruar me shenjë përkatëse 14+, duke vazhduar të veprojë në kundërshtim me Rregulloren KPM-2013/01

Analiza ligjore

7. Komisioni bazuar në të gjitha faktet dhe analizat e lartpërmendura konstaton se Pala Përgjegjëse është gjetur në shkelje të Rregullos KPM-2013/01.
8. Pala Përgjegjëse ka vepruar në kundërshtim me nenin 7, Shenjat dhe piktogramet, paragrafi 1 dhe 2 të Rregullos KPM- 2013/01, të cilët përcaktojnë se:

"1. Subjektet transmetuese do të përdorin piktogramet të paraqitura në Aneksin 1 të kësaj Rregulloreje."

"2. Shenjat e vërejtjes për Kategorinë e përcaktuar më këtë nen janë të detyrueshme për të gjitha programet e përcaktuara në nenin 5."

KPM, në bazë të Raportit të monitorimit ka gjetur se Pala Përgjegjëse gjatë transmetimit të filmit "Reasonable Doubt" nuk i ka përdorur piktogramet e parapara me Rregulloren KPM-2013/01, duke bërë shkelje të nenit 7, Shenjat dhe piktogramet, paragrafi 2.

9. Pala Përgjegjëse ka vepruar në kundërshtim me nenin 5, Kategorizimi i programeve, paragrafi 3 dhe neni 6 paragrafi 3 të Rregullos KPM-2013/01, të cilët përcaktojnë se:

"Kategoria e tretë përfshin programet, që përmbajnë skena dhune dhe frike, si dhe përmbajtje erotike, të cilat përsëriten relativisht shpesh. Këto përmbajtje të dëmshme programore nuk rekomandohen për fëmijët nën moshën 14 vjeçare. Për programet e kategorisë së tretë prania e prindit, kujdestarit, është e domosdoshme. Transmetimi i këtyre programeve duhet të paralajmërohet dhe të shoqërohet me shenjë përkatëse."

"Transmetimi i programeve që i takojnë kategorisë së tretë, mund të bëhet prej orës 22:00 deri në ora 06:00."

KPM në bazë të Raportit të monitorimit ka gjetur se Pala Përgjegjëse me datën 31.07.2021 ka transmetuar filmin artistik "96 Minutes", të cilin e ka kategorizuar si 10+ dhe e ka transmetuar rreth orës 20:00 dhe orës 00:25, të cilin e ka kategorizuar si 14+. Ky film i përket kategorisë së tretë dhe duhet të shoqërohet me shenjë përkatëse 14+ dhe të

transmetohet në terminet e përcaktuara për këtë kategori. Sipas Rregullores KPM-2013/01 programet e kategorisë së tretë mund të transmetohen prej orës 22:00-06:00.


10. KPM, ka gjetur se Pala Përgjegjëse edhe pas Njoftimit për shkelje të dërguar nga KPM ka dështuar të veprojë në pajtueshmëri me Rregulloren KPM-2013/01. Duke u bazuar në Raportin e dytë monitorues është gjetur se Pala Përgjegjëse ka vazhduar të transmetojë përmbajtje programe të cilat janë në kundërshtim me Rregulloren KPM-2013/01, duke mos i kategorizuar, paralajmëruar dhe shoqëruar me shenjën përkatëse.
11. Komisioni duke u bazuar në faktet e lartpërmendura ka gjetur se Pala Përgjegjëse ka bërë shkelje të nenit 7, paragrafi 1 dhe 2, nenit 5 paragrafi 3, dhe nenit 6, paragrafi 3, të Rregullores KPM-2013/01.

Vendim

1. Pala Përgjegjëse sanksionohet me Vërejtje, në pajtim me nenin 30, paragrafi 1 të Ligjit të KPM-së, për shkelje të nenit 7, paragrafi 1 dhe 2, nenit 5, paragrafi 3 dhe nenit 6, paragrafi 3, të Rregullores KPM 2013/01 për Mbrojtjen e Fëmijëve dhe të Miturve në Shërbimet Mediale Audiovizuale.
2. Obligohet Pala Përgjegjëse që në afat prej dhjetë (10) ditësh, pas pranimit të këtij Vendimi, të bëjë kategorizimin e filmave dhe serialeve të cilat i transmeton, t'i paralajmërojë ato para fillimit me sinjal verbal dhe akustik dhe t'i identifikojë me simbolin përkatës vizual gjatë tërë kohëzgjatjes së tyre sipas kategorizimit të programeve të përcaktuara me Rregulloren KPM-2013/01;
3. Obligohet Pala Përgjegjëse që, duke u bazuar në nenin 3, paragrafi 5, të Rregullores KPM-2013/01, të nxjerrë Kodin Praktik në të cilin do të përcaktojë standardet vetërregulluese për transmetimin e programeve që mund të kenë ndikim të dëmshëm tek fëmijët dhe të miturit, dhe këtë Kod të miratuar ta sjellë në KPM brenda tridhjetë (30) ditësh pas pranimit të këtij Vendimi;

E drejta për ankesë

12. Ankesat i parashtrohen Bordit për Ankesa brenda tridhjetë (30) ditësh nga pranimi i vendimit të KPM-së në pajtim me nenin 29, paragrafi 5, të Ligjit të KPM-së. Ankesa bëhet me shkrim dhe duhet të përcillet me dokumente ose dëshmi që mund të kërkohen nga Bordi i Ankesave në pajtim me nenin 42, paragrafi 2, të Ligjit të KPM-së.
13. Bordi për Ankesa do t'i merr parasysh vetëm ankesat e bazuara në informacione ligjërisht relevante të cilat nuk ishin të disponueshme në kohën e marrjes së vendimit të KPM-së, apo të bazuara në mundësi se ekzistonte gabim procedural dhe material i bërë nga ana e KPM-së gjatë marrjes së vendimit.


Xhevat LATIFI
Kryetar



17.08.2021
Datë